



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Taoba Arunachal minister
Dibang Tatak Covid19 agi asü

Nepal parliament loksatsüba
atema opposition-i ken o benoktsü



VOL. XVIII NO. 219 (ADOK 219) DIMAPUR

TENTONÜ (MONDAY)

MONUPII (MAY) 24, 2021

₹ 5.00

Nagaland nung ghonda 48 tsüngda MO 56 yoktsü

Dimapur, May 23, 2021 (TYO): Nagaland Health & Family Welfare department-i ghonda 48 tsüngda Health Care Centre balala dangi medical officer 56 yoktsü, ta Health & Family Welfare Minister, S Pangnyu Phom-i metetdaksü.

"Iba ama tensa ka nung nübertemi nüngdakba ama teyari agütsü atema Department-i lanur aser bendanga agütsüba Medical Officer 56 mapa lezmüksütsü" ta Minister Pangnyu-i Twitter nung ashi.

"Onoki akokba tashi yaritsü anungji nübertemia sorkar aser department den amalitepa yariteptsü mepishir" ta paisa ashi.

May 19, 2021 nü High Powered Committee on COVID-19 rongdak senden ka amandang tawa doctor 56 tashi mapa nungi shimokba osang metetdakja liasü.

Iba ajanga NHM kübok doctor aser nurse mapa tazüngtem adokba nung temporary basis nung nisungtem shimoktsü, ta parnokisa ashi.

Mkg mozü ki ghonda 48 shibanger

Mkg. May 23 (TYO) : Mokokchung Civil Hospital koba dang Dr. Imkongliba Memorial District Hospital ta ajar, iba mozü kidang nisung kar dak Covid-19

tashidak putetba ajanga May 23, 2021 nü nungi ghonda 48 shibanga ayur ta Mokokchung D.C. Wb. Limawabang Jamir ajanga metetdaksüo.

State timba kati CBSE tatidang aginür; June 1 tashi nung anogo metetdaksütsü

New Delhi, May 23, 2021 (Agencies): India nung state tem tsüngda board exams agitsü atema obang kati maruteter saka state timba kati board exams aginür ta osang angazüker.

Centre sorkar nung minister temi state education minister aser education secretary tem senden amandang state timba kati CBSE board exams aginüba lemsatop.

CBSE indang class 12 board exams ya mapang tajung ka nung agitsü aser May 30 mesüra June 1 tashi nung final exam anogotem

metetdaksütsü ta osang ajanga ashi.

Taoba mapang CBSE-i June 1 nü senden ka amandang tatidang agitsü atema jembitsü ta shialiasü.

Defence Minister Rajnath Singh-i anir senden amandang Delhi aser Maharashtra dena state kari board exams agitsü memolung.

Iba senden nung board exams agitsü molungertemi taküm September ita mesüra COVID-19 wara tanabuba süitemba sülen agitsü ashi.

DALT-i maneni public atema ola adoker

"NCD-i sen kanga magitsüla; Sorkari teyaritsü tim yaritsüla"

Dimapur, May 23, 2021 (TYO): Naga Council Dimapur (NCD)-i Naga Cemetery Dimapur tasenba nung mang endokba atema sen onsara agiba atema aoksar ta Dimapur Ao Lanur Telongjem (DALT)-i Deobarnü metetdaksü.

"Tawa Dimapur nung tasü mang aremdang sen aika agir ta nisungtemi ola adoker anungji District administration-i iba asoshi teinyaktsütem inyaktsüla. Talisa, nisung aika Covid ajanga asür asünung lokti atema inyakba telok kati Covid-19 agi shiranga asürtembo angati remdaksütsüla. Sensakertem dang nungi mang aremba indang sen memeshitsüla" ta Media Cell, DALT sangdong ka nung ashi.

Nagaland nung NGO tejentiba rongnung NCD ya tanabuba lir aser NCD tenzükli nungi Naga nung longjemdaksüba dang masü saka non Naga nung ajak den tesentaktep tajung yanglua arur, ta parnokisa ashi.

"Nagaland sorkari 400 jumbo (D type) aser 800 B-type oxygen cylinders aliba den ano World Health Organization (WHO) nungia oxygen concentrators 150 nguogo aser ano tarutsü anogotem talila angutsü lir. Tesüiba mapangtem Nagaland nung sorkar indang osettem aser senotsü nija meyong akümba ajangshia

aruogo, anungji onoki state sorkar dang nisung taküm kümzüksü atema bener osettem timi nüngdakba ama alemtsü mepishir. Aiben sorkari state yimtiba nung dang temolung agüja arur saka tangbo shirangertem aliba repranger, nüngdakba ama lema agütsütsüla," ta DALT-isa metetdaksü.

"Dimapur district nung COVID tensa tamajung ajurua lir aser iba nung frontline workers, Arogotem, lokti tentettem aser kijatem den Administration-i akokba tashi inyaka arur. Ajisüaka, iba ama tensa ka nung Dimapur district nungi MLA pungui ola madokba atema aoksar. Dimapur nung alirtemi MLA tem dang nungi imlaa liasü saka parnoki parnok tebilemstü khuret angateta meinyaker. Anungji onoki parnok dang public atema inyaktsü mepishir" ta DALT-isa ayongzüker.

Arogotem, lokti tentettem aser kijatemi iba wara anema maparen balala ajanga yaritepba atema tenüsang agütsür aser kanga pelar. Talisa, Dimapur nung Ao arogo balalai mapa inyakba nung DALT züngsem ajaki asenoka arogo nung züngsem kaka ta angateta yariteptsü ayongzüker, ta Media Cell sangdong nungsa metetdaksüo.

COVID-19 Nagaland: Nisung 20000 adenogo; 14 asü

Kohima, May 23, 2021 (TYO): Deobarnü Nagaland nung nisung 223 dak puteta COVID-19 puteter nisung 20,000 adenogo.

Tanü nisung 223 dak putetba den 137 taneptsü angu aser 14 asü.

"Deobarnü nisung 223 dak COVID-19 putet. Parnokji Kohima nung 78, Dimapur nung 77, Tuensang nung 23, Phek nung 14, Longleng nung 11, Zunheboto nung 10, Mokokchung nung 5, Mon nung 3 aser Kiphire nung 2 lir" ta Health & Family Welfare Minister, S Pangnyu Phom-i metetdaksü.

"Maneni COVID-19 puteta alir nisung 137 taneptsü angu. Parnokji Dimapur nung 95, Kohima nung 26, Tuensang o Mon nung pungugu (5) aser Peren o Phek nung asemsem (3) lir," ta paisa ashi.

Tanü puteterem züngsema COVID-19 puteter ajak agi nisung 20,068 kümogo. Parnok

rongnungi nisung 14,500 taneptsü nguogo aser tang 4,678 anepaludar, ta Minister Pangnyu-isa ashi.

"Tang anepalurtem rongnung nisung 178 dak shirangba yimya tera lir, 56 tera shiranga oxygen agir, 87 kanga shiranga oxygen medeni anepalur aser 12 ventilator nung lir" ta Integrated Disease Surveillance Project atema state nodal office officer, Dr Nyanthung Kikon-i metetdaksü.

Deobarnü COVID-19 puteta alir nisung 14 asü. Parnokji Dimapur nung 12 aser Mokokchung nung 2 liasü aser parnok züngsema tasür ajak agi 285 kümogo. Ajisüaka, nisung 11 bo tanga tashidak ajanga asü, ta paisa ashi.

Nagaland nung COVID-19 puteter nisung 605 tashi tanga state temi ogo, ta Dr Kikon-isa shisem.

Nagaland nung COVID-19 alitsü akok ta temolung melemi bilemba sample 1,83,703 tendangogo. RT-PCR ajanga 87,008, TrueNat ajanga 53,701 aser Rapid Antigen Test ajanga 42,994 tendang, ta paisa metetdaksü.

May 23, 2021 tashi nung nisung 1,99,460 nem COVID-19 vaccine indang dose 2,53,400 agütsüo, ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 56,834, healthcare workers 15,319, arishi küm 45 ser tempur 1,20,009 aser arishi küm 18 nungi 44 tsüngda alir 7,298 lir," ta paisa ashi.

"Tanü tashi nung nisung 53,940-i dose anaprong agiogo. Parnokji frontline workers 27,872, healthcare workers 10,172 aser arishi küm 45 ser tempur 15,896 lir," ta Dr Thurr-isa metetdaksü.

Nagaland nung health care workers nem teyari agütsütsü Medical final year aser intern kaketshirtem anioktsü

Dimapur, May 23, 2021 (TYO): Nagaland state sorkari COVID-19 anema inyaker healthcare workers nem senotsü teyari agütsütsü.

Nagaland sorkari Government Hospitals, Health Care Centers aser nija mozü kitem nung mapa inyaker ajak nem Rs. 10 lakh agütsütsü osang metetdaksüo.

Maneni, Covid-19 anema inyaker health workers nem Government of India indang

Prime Minister Garib Kalyan Package (PMGKP) Insurance Scheme kübok Rs. 50 lakh agütsütsü.

Nija mozü kitem nung COVID-19 agi shirangertem anepaludang iba tashidak menaba healthcare worker tem temang anepaludang, sorkar healthcare worker nem agütsüba ama state sorkari senotsü agütsütsü.

Nagaland nung final year aser intern kaketshirtem clinical aser non-clinical Non-COVID mapa

temporary basis nung inyakdaksütsü atema Principal Director-i tetuyuba ka agütsüo.

Final year aser intern kaketshirtem ita asem atema mapa inyakdaksütsü maparenji District Task Force temi ketdangsüa inyaktsü lezmüksüo. Parnok ya tang atema Kohima aser Dimapur nung kaketshir semermer (30) aser tanga district 10 nung kaketshir terer (10) shimoktsü.

ENGAGEMENT AND STIPEND:

	On Clinical COVID/Non COVID-19 Duty/ Essential Services	On Non-Clinical Duty
a Intern (MBBS)	Rs. 25000/- pm	-
b Intern (BDS/AYUSH)	Rs. 20000/- pm	-
c Intern (BSc-Nursing)	Rs. 13500/- pm	-
d Intern (GNM/Technician)	Rs. 10000/- pm	-
e Intern (ANM)	Rs. 8500/- pm	-
f Final Year (MBBS/ BDS/ AYUSH)	-	Rs. 9000/- pm
g Final Year (BSc-Nursing/ GNM/ Technician)	-	Rs. 8000/- pm
h Final Year (ANM)	-	Rs. 7500/- pm
i Below Final year up to 2nd year student	-	Rs. 6000/- pm

Karbi Anglong nung DNLA telungpur 6 khaset



DNLA telungpur khaseta aliba yangi noksa nung angur.

Guwahati, May 23, 2021 (Agencies): Assam kübok Karbi Anglong district nung sepaitem den khatepdang Dimasa National Liberation Army (DNLA) telungpur trok khaset ta Deobarnü police-i metetdaksü.

Osang tejangja ka angazükba

sülen police aser Army longjemer Karbi Anglong district kübok Dhansiri tesem mita aodang khatap aser idangji telungpur 6 khaset, ta Assam police Special DGP (L&O) GP Singh-i metetdaksü.

Deobarnep züngia Karbi

Anglong nung Assam-Nagaland arrtsü anasa iba ya atalok.

Anogo ishika tejaklen DNLA telungpurtemi Dhansiri nung asür Sanjoy Ronghang khasetba sülen Assam Police aser Assam Rifles-i telungpurtem anema mapa inyaka arur aser tanü parnoki telungpurtem puogo, ta Assam police Special DGP-isa ashi.

Michibailung tesem nung DNLA telungpur trokji khaset, ta police ketdangsür kati ashi.

Iba tesem nungi AK-47 rifle 4 aser injang aika ngutetogo aser Michibailung nung maneni telungpurtem anema mapa inyakdar, ta paisa shisem.

Chakhesang Scholars' Forum pur webinar takok ngua agiogo

Kohima, Monupii/May 23 (TYO): Tanü tendak asen Naga lima nung 'quality education' maliba indang tuteta jembiba mapang, Nagaland nung kaketshir nem shisaliok tajung agütsüsü atema tazüng-tashir (scholar) temi asa-lentong tajung bener arutsüla, ta Professor Neivetso Venuh-i ashi.

Chakhesang Scholars' Forum (CSF) ajanga "Roles of scholars towards the society" omen nung ajemdaker Honibarnü webinar ka ayongzükdak jembiba mapang, Naga society nung shisaliok jenjang mali, ta Nagaland University nung Department of History and Archaeology indang Professor Venuh-i ashi.

Kaketshirtem degree tali nguaka jenjang maka, koba agi lokti nung tebilemsü tali adokdaksür, anungji kaketshir ka degree liaka shisaliok jenjang tajung melira, parnoki takum melitetsü, ta pai ashi.

Science aser technology tsütsü renloka aoba ajanga nüburtem temelaba nung alir, saka kasa mapang chichiba masü (artificial) kümogo, aser kaketshir rongnung shisatsü chichiba agi anünga lir, kechiaser parnoki assignment mesüra project inyaktüsü atema internet dak metaloka lir, ta ashi.

Tanurtem nem jenjang aketba shisaliok agütsüsü atema tazüng-tashirtemi jungjunga shisadangtsüla, ta Venuh-i ashi.

Paisa scholar tem dang asen alidak loktiliba, yimtenren aser

rongsenketsüng tsütsü research agia kanga junga shisadanga tebilemsü koktetsü atema pei shisa tenlateptsü ayongzüka liasü. "Linük mashi ka nung puti otsü reprangdangra, tazüng-tashir temi jenjang aketba shisatsü agütsüba ajanga dang lokti ka melendaktsüba angur," ta pai ashi.

Sentong nung CSF Constitution Drafting Committee züngsem, Colo Mero-ia employment atema mapa kuma inyaktetba shisaliok tajung indang onüktem nungi jembiba liasü.

Tekolok shisatsü tajungtiba alirtem ya school, college, university aser arogo nung densema reju tem nung tesayur kaka akumtsüla, kechiaser tesayur kati anogoshi danga wadang yangertsür, ta pai ashi.

Anungji lokti ka yangertsü atema tashi-temeteter temi tongti shilem agitsüla, ta ashi. Shisashiri nübur nem tasüngtet mapa, ministry aser rongsen balala lemsatepa shilem agitsüla, aser iba nungji CSF züngsemtem mezüng asütsüla, ta Colo Mero-i ashi.

CSF chairman, Dr Zavise Rume-i iba sentong nung okila o jembiba mapang, linük tesem balala nung aliba university, college aser kaket reju balala nung azünger aser shisatsü bushirem aliba ajanga shisatsü tali angazüker, ta ashi.

Iba yongji academic discipline balala tsüngta mapang mapang sensaksem akatsü mechi CSF ya tenteta April 29, 2021 nü ketdangpur shimtet, ta

pai metetdaksü.

Village Development Board (VDB), Communitisation policy, tekong nung tzülu ayimba, entrepreneurship, indigenous medicines, sobaliba yimyatem, tarnunger otsü, lisopur chiyongtsütem amala nung research agitsü atema Chakhesang ya tetemsü asütsü ta jangjatetogo, anungji tashitemeteter temi 'intellectual properties rights' wazüka ayutsü atema ola adoktsüla, ta Rume-i ashi.

CSF pur virtual meet nungya Constitution Drafting Committee ka tenteta Dr Venüsa Tunyi ya convenor shim. Iba Committee nung züngsemtemji Colo Mero, Dr Riku Khutso, Dr Meneno Vamuzo aser CSF mendenpuba ya Ex-officio member alitsü. Iba committee nem züngsem saru aser CSE executive züngsemtem kümsük amala talenba yanglutsü nungloktsü.

Iba sentong nung CSF züngsem balalai pei tangatetba aser tatongba agi lemsatepa liasü.

Iba sentong tenzüka Oriental Theological Seminary nung Professor, applied theology aser director, Centre for pastoral renewal, Rev. Dr. Chekrovei Cho-o ajanga sarasadema liasü.

Iba sentong nung Tavezo Theluo, Asst. Prof., Pfutsero Govt. College menden liasü aser Baptist Theological College, Pfutsero indang principal tejenba, Rev. Dr. Yiepetso Wezah-i tepela ankep o jembiba liasü.

ADC Tseminyu ajanga metetdaksür

Dimapur, Monupii/May 23 (TYO): Tseminyu Sub-division nung Community Surveillance on COVID-19 aser Village Surveillance Team tentetsü asoshi ADC & Chairman (SDTF) for COVID-19 Tseminyu, W. Manpai Phom ajanga temetetsü aser teinyaktsü kar metetdaksüogo.

Sangdong ajanga ashiba agi, tekeratiba nung Health Department nungi ASHA worker, Social Welfare Department nungi Angawati worker aser NSRLM/RD

Department nungi SHG tem densema Village Surveillance Team tentetsüla aser parnoki yimtsüng nung Influenza Like Illness (ILI), temang metaba, aketba aser tango sashidang tim atemba densema Severe Acute Respiratory illness (SARI) tem jangjateta osang agütsüsü.

SMO Tseminyu den Chunlikha & Tesophenyu indang MOs ajanga CDPO Tseminyu, BDO Tseminyu aser BDO Chunlikha den lungjemer VST tenzüksütsü, ta ashi.

Maneni VST aser liaison

committee nungi densema Sub-Division nung Community Surveillance Team tentetsüla. Sub-Division atema Community Surveillance Team ya SDTF, Tseminyu tawabangba kübok alitsü, ta sangdong ajanga ashi.

SMO Tseminyu den Chunlikha aser Tesophenyu nungi MO temi community surveillance ya tenzüksüla aser block supervisor tem nungdakba aser inyaksangshi osangtem Tseminyu SDTF nem agütsüsü, ta metetdaksü.



Imphal, Monupii/May 23 : COVID-19 agi shiranger isolation nung alirtem den par timtem angatetsü mechi video conference ajanga sensaksemba sülen, state nung COVID-19 agi asürtem temang arongba aser aremba mapang sen indokba ajak Manipur sorkari menoktsü, ta Chief Minister N Biren Singh-i ashi. Ni parnok den sensaksemba mapang, kinunger COVID-19 agi sür parnoki timtem ajuruba indang nung angatetogo, ta CM Biren Singh-i pa indang Facebook page nung lemsatepa liasü.

PAWA ajanga asükhu lemsatep

Dimapur, Monupii/May 23 (TYO): Phek Area Wrestling Association (PAWA) ajanga sangdong ka nung, par Association indang champion mezüngbuba, Khunucho Khamo asüba atema asükhu lemsatepa liasü. Khunucho Khamo ya Lozaphuhu yimtsüng nungi Yesatsu Khamo'er jabaso liasü, shiba mapang tatsüka shiranger May 16, 2021 nü Phek Town nung asü.

PAWA President Khusuzo Khamo aser General Secretary Khosepa Vero nati sangdong ka nung ashiba agi, Asür Khunucho ya 1978 küm PAWA indang Champion mezüngbuba liasü. Pa ya tanaben 1982 küm

Champion akum. Asür Khamo ya Deputy Commissioner, Phek kübok Dobashi inyaka liasü.

Saisapong nung anisüngzükba sülen Asür Khamo-i jenjang balala nung nüburtem tenzüka liasü.

Pa asüba ya PAWA asoshi lenmang sayur aser nübur ajungmesoba lenir ka samaogo. Pa maliba ajanga tawa tulu adoktsü aser iba tawa asüngtsü kanga tasak alitsü, ta sangdong ajanga ashi.

PAWA ajanga mangyimer kibong den asükhu lemsar aser asür tanüla teti tatem maka tesunep nung anisüngzükjang ta sarasademtsür, ta sangdong ajangasa ashi.

Mon nung osettsüset nung jenjang temlokba mita jaja

Dimapur, Monupii/May 23 (TYO): Mon jila aser district kübok tesem balala nung tang lockdown mapang osettsüset nung jenjang temlokba osang angazükba nung ajemdaker, Deputy Commissioner, Mon, Thavaseelan K, IAS ajanga sangdong ka nung, osettsüset nung jenjang tali metemloktsü metetdaksü.

May 22, 2021 nü Deputy Commissioner, Mon indang sangdong ka nung, nisung kija

mesüra telok kari danga osettsüset/tongtipang osettem nung Maximum Retail Price (MRP) dak alia temlokba metetra merenshitsü aser parnok indang trade license meshia ayutsü, ta metetdaksü.

District nung osettsüset nung jenjang temlokba azüoktsü atema taoba mapanga mera balala agia sangdonga lir.

Maneni sangdong ajanga nüburtem danga osettsüset aliba ajak nung receipt meshitsü ashi.



May 22 nü Shamator nung Commandant 45, AR, Col. Amit Thakur-i, Yimchungrü Tribal Council tir S. Throngso Yimchunger matsüngda "Assam Rifles Cares for You" sentong tenzüksüogo.

DC, Phek ajanga VDMA tenzüksü tuyur

Dimapur, Monupii/May 23 (TYO): District nung COVID-19 cases tali akumba aser iba tashidak prokshia aoba azüoktsü mechi, Deputy Commissioner & Chairman, Distruct Task Force for COVID-19, Phek, Razouzolie Dozo ajanga Phek district kübok aliba yimtsüng ajunga nung tekeratiba nung Village Disaster Management Authority (VDMA) tenzüksü metetdaksü. VDMA nungya yimtsüng nung aliba health worker aser danga volunteers tem inoktsü akok.

VDMA indang teinyaktsü mapa yamai alitsü:

1. Sorkar indang agency yaritsü.
2. Nisung tasümg anepalutsü aser ketdangtsütsü.
3. COVID-19 dak sendakba cases tem mita repranga aser District Task force/Block level task force den amalitep alitsü.

4. COVID-19 putetba mapang ketdangtsürtem totuyuba nung ajemdaker ki shibangtsü/mükabanga ayutsü. Taneptsü anguba mapang ketdangtsür nungi totuyuba agütsüba nung ajemdaker ki shibanga aliba/mükabanga aliba lapoktsütsü.

5. Yimtsüng nung sorkar indang SOP aser COVID-19 totuyuba tem mapa kuma inyaktüsü.

6. Yimtsüng nung nungdakba aser tongtipang osangtem prokshitsü.

7. District Task Force/Block Level Task Force ajanga nungloktsüba mapa inyaktüsü.

Committee nem Medical Department-i nungdakba mapang anasatiba CHC/PMC nungi SMO/MO mesüra health worker ajanga PPE kit, gloves, mask, sanitizer aser body hag amala agütsüsü, ta sandong ajangasa ashi.

Assam-i mezüngbuba Oxygen Express tonga aru



Assam chief minister Himanta Biswa Sarma-i Oxygen Express tonga aruba repranga ataba noksa nung angur.

Guwahati, May 23, 2021 (Agencies): Deobar anepdang 11:45 ako meta Assam nung 'Oxygen Express' mezüng tonga aruogo. Oxygen Express nungji containers 4 den medical oxygen 80 tonnes bena liasü aser Inland Container Depot, Amingaon, Guwahati tonga aru. Tanep Assam chief minister Himanta Biswa Sarma-i

Oxygen Express agizüksü atema Amingaon tonga ao. Chief minister Sarma-i Prime Minister Narendra Modi aser Centre sorkar dang Oxygen Express ajanga medical oxygen yokba atema pelaba metetdaksü. Tetsükdaksütem ajak kochteta Indian Railways-i India kübok state balala nem Liquid Medical Oxygen (LMO)

maneni belener. Tang tashi nung Indian Railways-i linük kübok tesem balala dangi tankers 936 den timba nung LMO 15284 MT tashi bener otsüogo. Oxygen Express 234 tashi tatongtsü tongogo aser state aika nem anisüngzük ngudaksüogo. Oxygen Express ya April 24, 2021 nü Maharashtra nungi tenzüka liasü.

Darrang Police-i prangpong yanglur ana apu



Guwahati, May 23, 2021 (Agencies): Prangpong yangluba aser tanga ashikülak maparen inyaker telok ka Darrang Police-i puogo. Honibar aonung police telok kati mita aoba mapang parnoki item mapa inyaker telok nung züngsem ana apu. Darrang superintendent of police, Sushanta Biswa Sarma tetuyuba sülen anidaka, police

telok kati Bagarmari yimtsüng nung Moin Ali'er ki mita ao. Ali'er ki mita aodang police-i 'country-made rifle' pungo, 'military camouflage' jora (pair) 8 aser police uniform jora ka ngutet. Iba maparen dak sendakba nung police-i nisung ana apu. Tenaji Bandiya yimtsüng nungi arishi küm 36 tain Sahar Ali aser Dhansiri Kash yimtsüng nungi

arishi küm 35 tain Harunul Rashid na lir, ta Darrang deputy superintendent of police, Mamoni Hazarika-i ashi. Ajisüaka, police aruba lazüka iba maparen nung tongti shilem agisang aser ki kibur Moin Ali jena oadok. Mangaldai police station nung police-i ken o ka benokogo aser bushisüngdangtsü tenzüko.



May 23, 2021 nü Assam, Morigaon district kübok Burha Mayong yimtsüng nung health workertemi tetsür chanu ka dak COVID-19 tendangba yangi noksa nung angur.

Mizoram nung Covid-19 puteter 10,000 ajangtetogo

Aizawl, May 23, 2021 (Agencies): Deobar anepdang Mizoram nung nisung 214 dak COVID-19 tashidak tasen puteta, state nung iba tashidak puteter nisung 10,220 tashi kümogo, ta health ketdangsurtemi ashi. Tanü tashi nung iba wara ajanga state nung nisung 31 süogo aser Covid-19 agi shiranger 7736 shi taneptsü nguogo ta ketdangsurisa ashi. Tang Mizoram nung nisung 2453 tashi iba tashidak agi shirangdar. State nung positivity rate shilem ji 6.20% lir, ta paisa ashi. Tashidak tasen puteter

nisung 214 rongnung, RT-PCR test ajanga nisung 65 dak iba tashidak aliba tendangtet. Kasa mapang TrueNat ajanga nisung pungo aser tanüngba case 144 ji Rapid Antigen Test ajanga putet, ta paisa metetdaksü. Honibarnü, Mizoram nung tanur 54 densema nisung 292 dak novel coronavirus aliba puteta liasü. State immunization officer Dr. Lalzawmi-i ashiba agi, nisung 2,46,511 nem COVID-19 vaccine mezüng dose agütsüogo aser Hokolbar tashi parnok rongnung nisung 51,960 tashi dose tanabuba agiogo.

Ukhrul nung menoknok anak

Imphal, May 23, 2021 (Agencies): Deobar anepdang Manipur kübok Ukhrul nung menoknok anak. Iba tesem nung anakba menoknokji Richter scale nung magnitude 4.3 asadangtetogo, ta National Centre for Seismology (NCS)-i metetdaksü. "23-05-2021 anepdang 06:56:42 IST ako meta Lat: 24.79 & Long: 94.94 - Ukhrul, Manipur, India nungi kilometer

49km ESE pila orr kilometer 109 ali telung nung magnitude 4.3 shi menoknok anak," ta NCS-i Twitter ajanga metetdaksü. May 15, 2021 nü Ukhrul nung kasa magnitude nung menoknok ka anoka liasü. Ajisüaka, tang tashi nungbo iba menoknok nung kiojen raksatsüba mesüra nisung taküm samaba osang kecha mali.

Taoba Arunachal minister Dibang Tatak Covid19 agi asü



Dibang Tatak Deobarnep (File photo)

Itanagar, May 23, 2021 (Agencies): Taoba Arunachal Pradesh minister Dibang Tatak Deobarnep Covid19 ajanga süogo. Anogo ishika tejakdang Dedicated Covid Hospital (CH) Chimpu nung pa anioka anepalua aru. Pa dak diabetes den temolungjang timtem liasü, ta osang angazüker. Arunachal Pradesh chief minister Pema Khandu, deputy chief minister Chowna Mein, taoba chief minister Nabam Tuki, Assembly speaker Pasang Dorjee Sona aser tangartemi asür Tatak asüba atema mangyimba metetdaksüogo. "Taoba Minister Dibang Tatak asüba atema temolung raksar. Tsüngremi par kibong nem tashi agüjangma. Mangyim tejashi lemsateper aser pa tanüla teti anisüngzük ngudakjangma" ta Arunachal Pradesh chief minister Khandu-i metetdaksü.

"Taoba Minister Dibang Tatak tanü asüba osang angashi temolung raksar. Rumgong Constituency nung kümsük ana tashi MLA inyakogo. Pai Minister aser Chairman ama nübortem tenzüko. Par kibong den asükhu lemsateper aser sünepjang ta sarasademtsür" ta Arunachal Pradesh deputy chief minister Chowna Mein-ia ashi. "Taoba minister Dibang Tatak asüba atema temolung raksar. Par kibong aser medemertem den asükhu lemsateper" ta taoba Arunachal Pradesh chief minister Nabam Tuki-ia metetdaksü. Dibang Tatak asüba atema kanga jashir. Pa ajungbena asübaji state atema takoksa lir. Tasür kibong den mangyim lemsateper. Pa tanüla teti anisüngzük ngudakjangma" ta Arunachal Pradesh Assembly speaker Pasang Dorjee Sona-ia ashi.



TIR YIMYIM YIMOBILEM (EDITORIAL)

DIMAPUR TENTONÜ, MONUPII(MAY) 24, 2021

Missionary masü Auer 10,000 !

Kenü WhatsApp telok ka nung sensaksem dang yangji züngsem tajung kati, tanü Nagaland tia majungba indang temulung zürep o ka lemsatepdang, Nagaland ya Khrista asoshi anungji Nagaland nungi Yisu Khrista osang tajung abener missionary 10,000 yoktsü ta nangzük saka tanü tashi nungbo asenoki nangzükba Missionary 10,000 melena to yimten nung yimsüsür aser government nung tongti ketdangser turlurtemi anir auer-ang 10,000 adokdaksüogo ta zülur yokba ngua, kanga aoksa aser shitakanie ta kanga akseta bilemogo. Atangji, shitakba majung nungji, teti Nagaland nung ochimashi inyakba tia indang bilemer, jembir aser zülur saka kodanga missionary 10,000 melena auer 10,000 adokdaksüba indangbo tebilema mebilem aser mereprangtet aser kodanga medemdanga asenok tashi mait indangji mebushi. Ajsüaka, kodang senso tajung kati ashibaji jungjunga bilemdangdir, atangji nung asenoki missionary-bo kwika shi adokdaksütetar meshitet saka küm ishika tsüngda auerbo meyrirjang 10,000 dang masü saka lakh junga adokdaksütetter südi ta bilemer. Tamajung aser ochimashi nung tokteper tangar lima kar danga lira, item limatem dang nungi asenok ochimashiba jenjang nungbo teküpbokbabo masütsü. Atangji, tanü asen lima nung missionary meyrirjang ter melena auer 10,000 indang jembidang, asenok mulungjangi jet ta government nung yimsüsür aser turlurtem dang arur, anungji nübortemi parnokji akümketa masü auer amato dang temulungjang nung menüjaa aser sempaa repranger. Ajsüaka, kodang asenoki asen lima nung shitakba auertemji sükdangtsü tenzükdir, parnokjiang masü asen mezüng ser tangartemjibo tesülenang süklöksüsa aseni asen ochimashiba mapa aser jaklatem reprangtettsü. Aji oda, auer meyrirjang 10,000 rongnungji asenoki bilemba aser reprangtetba yimsüsür aser turlurtemjibo auer meyrirjang ka shiang asütsüa akok saka tanüngba auertemjibo asenok rongnung mapa meinyak ser sen agizüka agirtem; mapai mao ser ita sen achirtem; tangar tenüng list-sa list yanglur sen agizüka achirtem; tiyazü central project yanglua sen agizüka agirtem; tangar taila nisung tenüng nung ita sen aser pension agizüka agirtem; mapa ajak nung commission meshirtem; tim masüba tax agirtem; government office aser kaketrejutem aser mozü kitem nung nungdak osettem shitak magütsü yur agütsür ama bill yanglua agirtem; tantsür tambur, kinü tanur, nubentsür, shiranger, matamabensar, aluyimer aser sensakertem asoshi teyari aruba chitsürtem; tasoba küm ajema zülua yur mapa nungi manen ita sen achirtem; election nung pei vote sen aser mapa yong yoka achirtem; küm shia pei department aser office nung adjustment asüba agi taküm alirtem asenok aika zünger mezüngma, Nagaland nung auer list nung meyrirjang ter ta masü lakh dak tali adoktsü. Atangji yimsüsür aser turlurtemji auer tetsüditem asütsü, kechiyong parnok ita sen den mesütep, Mukesh Ambani nung ama industry tulu lapoka ayuba nungi tajangzük anguba agi inyaker ama, manger sangwa nung takar kümer sayutetter. Aji tesümgangtsüka. Ajibo Alibaba aser Auer 40 otsü nung Open Sesame aser Shut Sesame ain tashi agi dang inyaketba mapatem asütsü. Ajsüaka, ochimashi aser ayuba nung tetsüdi techanu aser auer tulu tila kecha mali, mapai mao ser ita sen tilaka agizüka agiba, sen meyrirjang ishika mesüra government mapa tilaka yong pei vote ayokba, yimtak RD sen nungi sen mechimenuka agizüka agiba ajakji kasasa ochimashi mapatem, anungji auer telok rongnungji adentsü. Aji oda, asenok ajaki ayur asünungji, asenok shingaia auyabaji taia ta mebiler, anungji maker. Nagaland government otsü nung karibo Yisu tenüng nung sarasademer nübortem meyong shilem nungi commission aser percentage meshiba otsü lir. Tanü asen lima yanglushitsü asoshi tebilemstüji auyabaji masü saka ayuba agi aktsü melen nümadangdangteta libaliruba ya asütsü. Auyabaji alima yimya saka kodang ayuba agi rongsen bendenba nung asenok akümtsübu agüja tenüngsangtepdang, asen kibong, asen kin aser asen lima yimten aser arogo yimli tatem kati arur ta bilemdi. Tanü shibabo tebu aser tebuoi auyaba rongsen agi senmang küma jangratema lia angur? Aser asenok rongnung shir chir aser semchirsemnurtembo auyaba rongen agi jangratema lia aotsü? Ibaji tajidaksüka lir. Tang asenok nem asen adianu ka ajanga missionary 10,000 melena auerang 10,000 adokdaksüogo ta reprangtetdaksübaji, asenok ajak den Tsüngremi meimba agi jembidaksür ta agizükdi aser asenok melenshidi aser yanglushidi.

OLEMSABANG

KONGI AOTSÜ SHIBA DAK JENOKTSÜ !

~ Mrs.R.Mapukala Rtd Teacher, Merangmen (Tzürangkong)

Wa-a..ma...Nisung ka talenba nungi sala-a nüji angu ama,
Alar ka kibur nungi temeden ngur pelaba mesük.
Ali poker mangashidangba wara nungi jenbo-ogo ta pelatep.
Pongmanga mesük, asangsanga mesük, tepang agibo rasa-a meshiteter.
Ojita nungi ramia angu ama, tatalokbabo angur, angashir, "SAKA" ...
Karibo teyazüa ta, kar-i ochia ta, shibaibo obendang agütsütetsü!
Süi-ogo...ojanga ta kichia makar-a tena pelatepmeso.

Tzüta tsüngrem tamajungi soit ama ano meyiba shilang-ogo na!
Temolung shimakogo...nisung sür logo-monger ang mesük.
Tenarongi angashiba osang ajak Covid..Covid..Covid...
Osang tajungbo mali..tetsübuttsü osang dang, tzürapur o chirnura majuruteter.
Asen sobaliba teyaritep, temeim samaogo. Arem min nung kija alir-ang mesük.
Küm aika shiranga lir asü nunga "CORONA" tetsübu agi sannüker-ia sarasadem magütsüteter.
Tsüngrem masü, saka nisung ozüng-ang tetsübuba kümogo.

Aki otzü obou nung mapanga tesashi wara-a jendi liasü,
Azüsen, yaksü, saksüpokshi, metongdakra, süngra, zünger mezüngtet.
Par mapangbo mozüki-a mali asü, Doctor, nurse-a mali asü südi-ja.
Tanü putu ama tamangtir temi sarasademtsü nung anep-ba mali asü.
Saka süng, long tsüngrem nem azü, anpong bener oa külem küja aru.
Tongmelang tamang agi pari amangba tsüngrem junga amangtet yong,
Idangjisa shiranger tem-jia anepa akümba otzü jendi lir.

Tanü Khristan taküm mapatem aroka shisadangra,
Asen ayak-ji temeim, aria pilemba, kati ka den yariteb baji lir.
Alakteta Naga nung sobaliba tajung ka-ji, timtem nung metoktsüteper,
Saka tangbo alima wara aser ozüng yagi kati ka dang yaritsü melena,
Tzürapur, chirnur, adianu, yimtsür, yimer ka süaka, tejaka mangu,
Tatem o ashitsübo pungmang, mangyim molung süngzüktsüer mali.
Temeim mekongka akümtsü ta lai nung zülua aliba to ataloker masü no!

Obula clark-i bener arua asen tenük sakdaksüba Yisu yimsü tajung,
Asen Tsüngrembo taküm Tsüngrem, pai makoktsü langka lir ma?
Yirusalem Arogo nungi tenzüka tanü tashi tamanger telongjem jangratemtsüka.
Tenla kidang pa külemdang temolungjang aser tanela renemshir.
Tanübo tekülem ki shibanga yur, temolung shirangseter, "Tsüa"
Kodanga yamaibo matalokdangka, saka temeshipur pei tamang agi taküm alitsü
Mt 24:21 nung kichiaser idangji timtem tekangshi tulu alitsü. Lipok nungi tang tashi nung,
Iba ama mali, aser malitsü.

Oh! Ali meimchirtem, arung asenoki ken shisangdi.
Anüng kübok tular, takar, tashir, sensaker, tilar, lajartem ajak,
Tenük agi manguba mesen kabo atentena tsübutteper.
Shibaibo sünütsü! Shibaibo metsübuttsü! Alima ozüngji angotsüla.
Saka meimchir takum madak shiba lir ta nisungi meshisadanger.
Tsüngrembo metsübur, tashidakbo tsübur, mesünür.
Temalen alisang, shibai ajak kümzüktsü akok, pa asen jenokdak.
"COVID" wara nungi kümzüktsü Tsüngrem dak tashi tulu lirko.
Alima nung shisaliok pushirtem tia ken arok-aroka pilemdangdi.
Tazüngertem ajak jenjang raksatetogo parnok komaser saktettsü.
Küm ishika sülen alima ya ashi auer lima küma aotsü.
Rongsen ketzüng tsütsü reprangdangra, jogo talangka lua-dokogo...
Asüng anogoji penzüdangra, takar, turlurtem, par semchirsemnur,
Tali, tali akatsü. Sensaker, leni maortem parnok lar akümtsü menua mali.
Ayatai ! Putu 21 buba nung alima anitsü lanurtem ya koda süla na?

Joko o tembang ya dang, tangar dak nendaka melili meranga inyakdi.
Shia meteta liaka, sensaker-i Government mapa malitetsü.
Sübosolem nung sen tali meintokli, chia-ajem kanga kümdangdi.
Tangar dang mali-i aseni inyaketba tsük lu, aser süngdonglidong aonsotsütem,
Naga nung ayakji meranga inyaker chiyongba kin asünung, ali dangi meyipdi.
Government-i titi asenok memesütsü, azümesen nem tekoktaktsü.
Iba den tepang nembangba sü, aser teka shidokba mozü dak temolung melemi.

1. Pei sasa kümdangdi. Lokti nungi pila-a lidi.
2. Angashiba ajak nung maoksatsü, olulu dak tali mamangtsü.
3. Aika jembiba nung tongtipangtem dak dang ametdi.
4. Ozüng aika liaka, pei lima nübor den apet amshidi.
5. Khristan shia-i pei tamang yari lumidi.
6. Mozü agi manepetra, Yisu azü agibo aneper ta amangdi.
7. Tsüngrem tenzükertem yirua alisang samaria nungba ama inyakdi.
8. CORONA tashidak nungi asen Tsüngrem-ang tetsübuba südi..
Ayimtendi..alima kinük pezü prongla nungi iba tashidak ainshidakjang ni....

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

MP nung nurse kati Covid duty mapang sayutsüngiba atema apu



Nurse Sandya Tiwari aser lai lemsatepba Christianity TV channel shows den Khristan websites noksa nung angur.

Bhopal (Madhya Pradesh), May 23 (Agencies): Madhya Pradesh kübok Ratlam district nung coronavirus duty inyakba mapang nung sayutsüngiba atema May 22, 2021 nü Khristan nurse ka anema ken o benokogo.

Osang angazükba agi, tribal nütsüng timba aliba Bajala nung coronavirus duty inyakba mapang nung lai sayutsüngiba den külemi Khristan kaketem lema agütsü; yangji alirtemi la apuba sülen police aser administration nem osang metetdakja liasü.

Mezüng bushisüngdang ajanga lai sayutsüngibaji shidak ta bushitet.

Coronavirus prokba nokdangtsü atema Madhya Pradesh nung kibong shia dangi oa survey agir, aser iba mapa inyaktsü atema ANM,

nurses, Anganbari aser Asha workers nem mapa lemezüktsü.

Honibarnü Rashtriya Swayamsevak Sangh (RSS) züngsemtemi Bajna nung Rapid Response Team nungi nurse, Sandhya Tiwari-i sorkar mapa inyakba mapang nung lai Khristan yimsü prokbaji meteta liasü.

Iba osang angazükba sülen RSS aser tanga Hindu tentetem iba tesemji tonga ao.

BJP lenir, Somesh Paliwal-i sayaba video ka nung la dang Khristan kaketem alemba atema asüngdangyaba aser lai RSS züngsemtem dang iba onük ya tuluka meküdaktsütsü mepishiba lir.

La dang asüngdangyaba mapang nung lai, "Ni nisung ajak den Yisu Khrista indang melemsateper, saka Yisu

nüngdakertem den ang lemsateper. Iba denji külemi ni chiyungtsü tajung chiyungba ajanga wara nungi kümzüka alitsü lemsateper; aser iba nungji kecha aibelena mali," ta ashi.

Police den ghonda ka shi jembiba sülen la police station-i anir oa la dang asüngdangya, saka lai tekong meranga lai kecha aibelena mali, ta ashi.

Tehsildar, Bhagwandas Thakur-a police station tonga aoba sülen osang metetpela aser la anema Sailana nung Sub Divisional Magistrate (SDM), Kamini Thakur nem ken o ka agütsü.

Nurse Tiwari-i alemba kaket nungji Christianity TV channel shows aser Khristan websites den sarasadem onük balala liasü.

Tawa Indian Medical Association (IMA) tongti, Dr. JA Jayalal-ia wara tenüng amer Khristan yimsü proker ta pa aija liasü.

Hospital tem nung pai nisung aika Khristan yimsü dangi meyipdaksür, ta pa nem tai tongloktsü.

Dr Jayalal-i tawa Indian Medical Association tongti menden anguba sülen Khristan missionary temi inyakba ama Khristan yimsü proker.

Coronavirus wara ya maangka ama agi pai medical students, shirangertem aser külem doctor aika Khristan yimsü dangi meyipdaksüogo.

ANO GO ABEN TSÜNGREM DEN

TEKÜMTET TSÜNGREM NUNGI DANG

"Ano tanaben ni nenok dang ashir, takar nisung kati Tsüngrem yimli-i aitsüba dang nungibo ajem ki ka ateta ut aotsü temelaba". Mathi 19:24

Yihuda nunger asoshi, azükaru aser rongsen kaaita alibaji Tsüngremer temoatsü aser Pa adenba temaitsü ta angateta liasü. Iba ama tensa ka nung Yisui nisung ka Tsüngrem yimli-i aitsüba dang nungibo ajem ki ka ateta ut aotsü temelaba ta jembiba angashia Yisu nütsüngtem janga süngmangtep. Tsüngremi moatsüba takar kati Tsüngrem yimli-i meitetra shibasa kümzüksü ta rata.

Yisui nütsüngtem dak rangloka ashi, "Nisungtem asoshi ya tamakoktsü, saka Tsüngrem asoshibo ajak takoktsü." Mathi 19:26. Yisui parnok dang shinübaji, nisungi pei sasa tekümtet angutsü tamakoktsü, saka Tsüngremi nisung ka nem Yisu ajanga tekümtet angati agütsür. Tanur, tain, takar aser sensaker tebensa kecha mali Tsüngrem taochi ajanga dang kümzüksü akoker. Ut-i ajem ki ateta oteba ama tekümtetji Tsüngremer tesüngmangtsü mapa lir. Saka mapa tajung inyakba, tenla agütsüba, Arogo aser lokti tenzükba agi tekümtet aazüktsü makok. Sixteenth Century mapang John Calvini ashi, Pei tashi agi tekümtet angutsü merangra, "adangji tesamaba ajurutsü".

SARASADEM

Yisu nai angati tekümtet bener arutsüba asoshi kanga pelar. Ya tesüngmangtsü mapa lir. Oba Ne nung asanger. Amen

Turkey-i Khristantem anema inyakba osang HRC nem metetdaksü

May 23, 2021: Melungtet telok pezüi Turkey linüki Protestant Khristantem anema inyakba, talisa bendanger Khristantem anema inyakba osang Human Rights Committee nem metetdaksü, ta International Christian Concern-i metetdaksü.

Turkey linüki parnok indang temzüng alema inyakba dang masü saka 2003 küm Turkey-i agizükba International Covenant on Civil and Political Rights (ICCPR) alema inyaker.

Linük nung minorities nem temeden magütsür. Turkey-i ICCPR agizükba mapang nung Arrla 27 ajanga minorities kümzüksü nangzüka liasü.

"Republic of Turkey-i ICCPR kübok Arrla 27 nung alibaji Turkey linük temzüng aser 1923 küm July 24 nü agizükba Treaty of Lausanne den külemi benshitsü," ta nangzüka

liasü saka iba ozüng kübok linük nung Khristantem reshikangshir.

Turkey nung alir bendanger Protestant Khristantemi aiben legal tsütsü timtem ajurua linük nungi mindoker mesüra ainlen senzütsü memelar. Talisa Protestant Khristantem nem N-82 code agüja lir, koba ajanga missionary aser outreach mapa inyaktsü melar.

Linük nungsa Khristantemi shisaliok, media aser loktiliba nunga timtem ajangshir. Human Rights Committee nem agütsüba report nungsa Turkish intelligence agents-i nija aser Arogotem indang osang metetdaksütsü atema Khristantem shimoktsü merangba indang shia lir.

Tang linük nung coronavirus wara mapang nunga Muslim nunger tekülem ki lapoktsü

melayonga Khristantem tekülem ki lapoktsü memelar.

Turkey linüki ICCPR kübok Arrla 27 dang masü saka 12, 13, 14, 23 aser 26 Arrlatem anema-a inyaker.

Kasa report nungji ICC aser Middle East Concern na indang joint report-a densema lir.

ICC aser Middle East Concern na indang joint report nungji yamai shia lir, "Turkey nungi Khristantem kangshia mindokba ya tang tasen masü. 20th century nunga Armenia nunger, Greek nunger aser Assyria nunger mindoka liasü. Iba ya ajanga Turkey linüki pastor tem, sayutsüngirtem aser Arogo züngsemtem security amokmeren nung ajemdaker mindoktsü atema Interior Ministry nem tashi agütsüba jangjar. Khristantem mindokba ya meimchir temeden anema lir."

Covid tanaben prokba sülen Vietnam Arogoi Tenla kitem shibanger

May 23, 2021: Tang Vietnam nung coronavirus wara ano tanaben prokba sülen Arogoi Tenla kitem shibangba den külemi Arogo nunger sentong ajak anenogo.

May 21, 2021 nü Ho Chi Minh City nung People's Committee vice chairperson,

Duong Anh Duc-i saisapong centers, massage parlors, theaters, film halls, bars, karaoke bars, discos aser public internet services ajak May 22 nungi shibangtsü tuyua liasü.

Duc-isa, Arogo Tenla kitem aser tanga tekülem kitem ajak shibangtsü aser nisung 20 dak tema madenshitsü atema tuyua liasü.

Iba sülen May 22 nü Ho Chi Minh City nung aliba Archbishop House nung chancellor, Peter Kieu Cong Tung-i Arogo ajak dang osang tasen ka memetdaksü tashi Tenla kitem shibangtsü tuyu.

Putirisa Arogotem nung putirtem dang alima nung coronavirus samatsü atema

anogo shia sarasademang aser tekülem sentong nung nisung 20 tashi dang adentsü aser nisung tsüngda metre 2 pilaa alitsü metetdaksü.

Anogo shia tekülem sentong agibaji Notre Dame Cathedral nungi live yoktsü.

Coronavirus agi mejungi kongshiba tesemtem nung Arogo züngsemtemi kidang ang amongtsüla aser temang nung timtem adokra healthcare centers-i aotsüla, ta putiri tuyu.

May 21 nü provincial ketdangsertemi coronavirus ajanga mapa meinyakteti alir nisung 24,000 nem anogo 10 tashi anogo shia Dong sen 75,000 agütsütsü lemet.

Parnokisa nübermtem dang coronavirus prokba nokdangtsü atema kidang nungi mayazüktsü aser bendangertem kidang manioktsü metetdaksü.

April 27 nungi tenzüka nisung 812 dak coronavirus putetogo; nisung ajak agibo 1,963 dak coronavirus putetogo aser tesüba anogo 25 tsüngda nisung trok süogo.

OLONG PAITEP # 5821

1			2			3		4		
					5					
		6								
							7			
		8								
9										10
				11		12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5820 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa,		7. Milak, 9. Zünga, 10. Temopu,	
13. Aoksa, 15. Putir, 16. Yipru.		12. Walu, 14. Ali.	



TANÜBO NAI LANGZÜANG

Q. Koba küm Smart City Mission tenzük?
 A.2010 B.2015 C.2014 D.2016
 _____ (Taruba adok nung onoki langzüsü)
YASHI ADOK TELANGZÜBA : NASA

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Jalu

(v) aginüa repring (envy)

* Merenbai gari tajung anena ngur tenük **jalu**.

Jangja

(v) kanga junga bendangteta metetba mesüra bushitetba (confirm)

* Onoki tonga orr tatalokba ajak **jangja**.

NAI-A YA METETTER MA?

APRIL 2021' ITA SAYABA KEN TASEN KAR:

(Song Title)	(Artist/Band)
1. Last One	Cassandra Violet
2. Awake (with Mahalia)	Chiiild, Mahalia
3. Space	AUDREY NUNA
4. Dust and Ashes	Quiet Arrows
5. THAT'S ON YOU!	REI AMI
6. Special Place in Hell	Suzi Moon
7. Nosebleed	ZOLA
8. Easier	Geneva White
9. Honesty	NYKO
10. Setas y Ceros	La Doña
11. Palms Casino	Sam Valdez
12. Empty Space	Alice Bloom
13. Sad Girl	Charlotte Cardin
14. L' Invitation	Freedom Fry
15. Send Me	Tirzah
16. Persephone	Allison Russell
17. Whatever Tomorrow	Chet Faker
18. Rubberband	Big Fun
19. Magic	Death Hags
20. Hurt	Kowloon
21. Tenere	Dag Tenere
22. Story	Myoon
23. Zaatar	Os Barbapapas
24. Lagoon Havana	Swim Club
25. Better Drugs	Jeen

SUDOKU # 5864

TELANGZUBA # 5863

7	1	3	9	2					1	2	4	6	8	5	9	3	7
	9		1	4	8	3	2		7	6	5	3	1	9	8	2	4
	8			3					8	9	3	7	4	2	5	1	6
		9	7		1		5	5	8	1	4	3	6	2	7	9	
	3	2	5	6			7	2	3	7	5	9	1	6	4	8	
			4	1		8	3	9	4	6	2	7	8	1	5	3	
3			2	1	5		7	9	4	1	9	8	2	3	7	6	5
	2	5			7	3		6	3	5	8	1	6	7	4	9	2
	7		3	6					6	7	2	9	5	4	3	8	1

OJANG LUTEP # 5407

EMEÜKMTENERR :

RASE :

MKACOKOHIR :

NGDTSÜANG :

JUTANG :

MÜRESA :

TJUNAMAG :

CHKEA :

MEDANBENGI :

UTSTILÜR :

OJANG LUTEP TELANGZÜBA # 5406

KHEN MEBILEMDANGI JEMBIBA MESÜRA INYAKBA NUNG TETI ASOSHI MERENSHITSÜSA AKÜMER

TAN HOPTA ATEMA - KOMA SÜLA ?

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

India nung ano nisung lakh 2.40 dak Covid putet aser 3,741 asü



May 23, 2021 nü Jammu nung aliba Jogi Gate Cremation Ground nung coronavirus tashidak agi shiranga asür kinüngertemi tasü mang rongdokba noksa nung angur.

New Delhi, Monupii/May 23 (Agencies): India linük nung ano nisung 240,842 dak coronavirus tashidak putet aser nisung 3,741 süogo.

Tanü agi anogo tenetnübuba linük nung anogo shia nisung lakh 3 den tajemba dak coronavirus puteter; tang tashi nung linük nung coronavirus case ajak agi 2,65,30,132 jungogo aser iba tashidak agi asür ajak agi 2,99,266 jungogo, ta Amongnü anepdang 8:00 ako nung Union health ministry data ajanga metetdaksü.

Tang linük nung coronavirus agi teshirangdakpur 28,05,399 lir, aser ibaji coronavirus

caselaod nungi shilem 10.57 lir. Linük nung iba tashidak agi shiranger shilem 88.30 (nisung 2,34,25,467) anepogo aser iba tashidak agi shiranger asüba shilem 1.13 kümogo.

Amongnü Indian Council of Medical Research (ICMR)-i ashiba agi, May 22, 2021 tashi nung linük nung samples ajak agi 32,86,07,937 tendangogo, aser iba nungji Honibarnü samples 21,23,782 tendangba densema lir.

Ano külen tanga osang ka nung, coronavirus tashidak keta alirtem dak Black Fungus mesüra Mucormycosis ta ajaba tashidak ya India atema

tebilemstü onük tuluka kümogo. Tang tashi nung linük nung coronavirus agi shiranger 9,000 jungnüa dak iba tashidak putetogo.

Tang state 8 nung coronavirus agi teshirangdakpur lakh 1 dak tema lir aser state 20 nung teshirangdakpur 50,000 den tajemba lir, ta Health Ministry-i metetdaksü.

Linük nung coronavirus agi tamajungba kongshiba state, Maharashtra nung wara süngjemdar saka Karnataka, Kerala aser Tamil Nadu nung maneni tensa tamajungba akümer.

Tanurtem dak coronavirus tashidak kanga bulua putetdar

New Delhi, May 23 (Agencies): Tang India linük nung coronavirus tanaben prokba mapang nung tanurtema aika dak coronavirus kanga bulua putetdar, ta Union Health Ministry-i jangjaogo.

Maharashtra, Karnataka aser Delhi nung mezü ng tanurtem dak kanga bulua coronavirus putetba jangjaogo. Iba tashidak putetba tanurtem dak temaitsütem rongnung temang metaba, aketba, anibelem, terok ashiba, memenemtetba, tebok aoba, temang nung anakra mesüra adokba aser yimra atongba densema lir, ano tanur karbo

tangu mesashitetba mesüra tangu mesabuba timtem liasü.

Osang angazükba agi, March 24 tashi nung arrshi küm 10 ser tekübok tanur 81,188 dak coronavirus puteta liasü aser May 6 tashi nungbo tanur ajak agi 1,49,224 dak coronavirus putet. Iba denji kasa arrshi küm 11-20 tsüngdapur tanur lakh 1.66 dak iba tashidak putetba sülen May 6 tashi nungbo parnok lakh 3.38 dak iba tashidak putetogo.

Karnataka COVID War Room osang ajanga ashiba agi, Karnataka nung March 1 nungi tenzüka May 15 nü tashi nung arrshi küm 10 ser tekübok tanur

20,206 dak coronavirus putet aser iba nungjagi tanur 17 bo süogo.

Delhi nung tanurtem iba wara nungi kümzüksü atema Delhi sorkari special task force ka tentetogo. Delhi Chief Minister, Arvind Kejriwal-i, linük nung coronavirus third wave anema raratsü asoshi sorkar renema lir, ta metetdaksü.

Uttarakhand Health Department-i ashiba agi, yaküm tanur 2,131 dak dang iba tashidak puteta liasü saka takümbo April 1 nungi April 15 kija nunga tanur 264 dak iba tashidak putetogo aser May 1 nungi May 14 tashi nung tanur 1,618 dak iba tashidak putetogo.

Maharashtra Congress aser NCP-i Centre sorkar tamakok metetdaksü

Mumbai (Maharashtra), May 23 (Agencies): Centre nung Narendra Modi-i aniba NDA sorkar kümsük tanabuba tentetba sülen May 26 nü küm ana ajungtsü lia Maharashtra nung Congress aser NCP-i Modi-i aniba sorkar aitsüogo.

Maharashtra nung Congress lenir, Anant Gadgil-i, "Gujarat model" nung ajemdaker 2014 küm Modi-i takok angu, saka coronavirus wara poktetba sülen par sorkar jungkai adokogo; kidanger state (Gujarat)-i wara menokdangtetba atema High Court-i BJP sorkar arrtsüogo, ta ashi.

"Uttar Pradesh nunga BJP sorkar lir aser assembly nung parnok majority lir, aser iba state nunga moapu nung asüpila sentongtem agiba noksa aser ayongtem nung tasü mang indokba noksatem International osangkakettem nung adokogo. Goa nunga oxygen supply maliba agi coronavirus agi nisung jenti süogo," ta Anant-isa metetdaksü.

BJP-isa yimsüsüba state Karnataka yimtiba, Bengaluru nung tensa kanga majung aser iba yimti nung tasü mang rongdokba tesem 13 nungi 7 bo coronavirus agi asürtem tasü mang rongdoktsü atema mekazüka yuogo, ta paisa metetdaksü.

NCP lenir aser Maharashtra minister, Nawab Malik-i, Modi indang "Indian model" agizüker shinga mali, ta ashi.

Nawab Malik-isa, "Tasü mang aika ayong nung indoker, oxygen maliba agi nisung jenti asür, vaccine dose mali saka vaccination drive sangdonger. Iba ama model ya shingaia magizüktetsü. India nung model ka nüngdaker, ajisüaka tai tongloksütsü aser aitsütsü atema BJP-i maongka agütsür," ta ashi.

"Mapa tajung inyakttsü merangtsüla, takok ngura nüburtemi tenüngsang agütsütsü, saka parnoki (BJP) tamakok magizükteter," ta paisa shisem.



May 23, 2021 nü Hyderabad nung aliba hospital ka nung coronavirus agi shirangertem treatment agiba noksa nung angur.

Cyclone Yaas atema Ato kilonseri review senden ka ayonga amen

New Delhi, May 23 (Agencies): Cyclone Yaas-i anüdoklen India kongshitsü mapang ana nung lia Amongnü Ato kilonser, Narendra Modi-i anüdoklen tzyüymkümlen alirtem mapang shidak nung ainshidaktsütsü atema metetdaksü.

Cyclone Yass atema state tem aser Central agencies renema aliba jenjang asadangtsü atema Ato kilonseri review senden ayongzüka amen.

PMO sangdong ka ajanga ashiba agi, senden nung Ato kilonseri ketdangsertem dang tzyüymkümlen aliba tesemtem nungi nisung ainshidaktsüba maparen nung state tem den yaritepang, aser yipru süiba sülen akokba tashi tekaraba nung power supply aser communication network yanglushiang, ta metetdaksü.

Paisa ketdangsertem dang iba yipru ajanga hospital tem nung coronavirus agi shirangertem treatment agiba aser vaccination nung timtem madoktsü atema state sorkar tem den amalitepa inyang, ta tuyuogo.


Amongnü India Meteorological Department (IMD)-i, May 26 nikongdang tashi nung cyclone Yaas ya West Bengal aser north Odisha tzyüymkümlen süitsü aser iba mapang nung mopungji ghonda ka nung kilometer 155 nungi 185 tashi keraa aontsü, ta metetdaksüogo.

Iba yipru süiba ajanga West Bengal aser north Odisha kübok tzyüymkümlen aliba district tem nung tzunglu kanga sashia arutsü.

Ministry of Home Affairs-i iba tensa mita ataba den külemi state sorkartem, union territories aser central agencies den tongtepratepa inyakdar.

Home Ministry-i jelia state tem nem SDRF aser National Disaster Response Force team 46 lezmüktsüogo. Iba dak alia Amongnüa team 13 lezmüktsüba den rongdak atema team 10 renema lir, ta PMO sangdong ajanga metetdaksü.

Tanü Modi-i ayongzüka senden nungji Union Home Minister Amit Shah, minister tem aser tongti ketdangsertema densema liasü.



Kolkata, May 23, 2021: Coronavirus lockdown ajanga Amongnü Kolkata nung yimti lenmangtem kanga azüngmeyaka aliba noksa nung angur.

Myanmar mitkar anemba telungpuri police post atsüngdok

Naypyitaw, Monupii/May 23 (Agencies): Myanmar mitkar anema nokdakba telungpur teloki Deobarnü linük anüdoklen Mobyte jila nung police station ka atsüngdoka security forces züngsem 13 tepset aser pezü apu ta ashir.

February 1 nü mitkartemi tashiyim amshia Aung San Suu Kyi'er sorkar atsüngdokba sülen Myanmar linük ajungalen azüdokshia aruba tang tesüsaba nung atalokba mesük, security forces indang tasümgang tem aliba video kar social media nung prokshia liasü.

Deobarnep China den arrtsü anasa parangbong agi khatepa liasü, aser Honibarnüa India anasa Myanmar nung jade mining aliba jila nung mitkar anemba kin tila nungi telok balalai maka liasü.

Mobyte nungi video ka nung security forces indang uniform agir nisung tasümgang ka sayu aser noksa danga kar nung nisung police pezü teka tesülen alener aser sü agi tenük zübangtsür liasü.

Iba tesem nung police indang gari ka nung mi jangrua liasü aser anasa telungpur aika liasü.

Yangji aliba People's Defence Force nungi züngsem kati Irrawaddy news outlet dang ashiba agi, police station nung mi senloksü aser yangji civilian ana yirua liasü. Security forces 15 shi süogo, ta danga osangtem ajanga ashir.

Mobyte ya linük yimtiba, Naypyitaw nungi kilometer 100 shi pilar lir, saka ethnic armed groups kübok aliba tesem anasa lir, shirnoki tashi tuluba meshia küm aika rarayonga arur.

Mitkari tashiyim amshia sorkar atsüngdokba anema nokdaker ethnic telok pezü

telungjemi Deobarnep Muse nung security forces den rara, koba China-i arrtsü alema aoba tesem tongtipang ka lir.

Mitkartemi tashi rakzükba sülen yangji aliba People's Defence Forces temi mitkartem anema nokdaker aser aiben shotgun aser kidang yangluba nok-o-nü amer rarar. Mobyte nung tangokba video ka nung item telok yagi assault rifle nungi injang khaloktsüba nguogo.

Tesem balala nung mitkartem asendenshir raraba mapang ano nüburtemi anogoshi longkak aitba ajanga mozüki, kaket reju aser jurila business tem marakzüteti lir.

Mitkari sorkar atsüngdokba anema nokdaka civil disobedience movement nung adenba mechi school tesayur 125,000 dak tema mapa nungi anentsüogo, ta Myanmar Teachers' Federation ajanga ashi.

Sorkar atsüngdokba sülen security forces temi nisung 815 tepsetogo, ta Assistance Association for Political Prisoners activist telok ajanga ashir.

Saka mitkar lenir Min Aung Hlaing-ibo nisung 300 den police 47 süogo, ta Honibarnü sangdong ka nung ashi.

Sorkar atsüngdokba sülen nisung 4,300 jungnüa pua aliba ya chiokang, ta nüburtemi akhanger, aser yangji par lenir arishi küm 75 tain Aung San Suu Kyi dena lir.

November ita Aung San Suu Kyi'er teloki takok anguba election nung ashikülak mapa inyaka lir, ta mitkartemi ashir. Koba taoba electoral commission-i magizük, aser iba commission ketdangsüra ter dak tema tepuokdak yua lir.



Gaza nung ceasefire sangdongba sülen Beirut, Lebanon nung aliba Martyrs' Square nung Lebanese aser Palestine nung meyirijang aika pelatepba mapang nisung kati pa indang tapubang nung par jabaso mendaktsür tanur kazütsü prangbong ka aser Palestine nung nisan ka amer aliba noksa nung angur. Iba ceasefire ya Islamic telungpur telok, Hamas ajanga Israel madak takok anguba ama züngshir.

DR Congo nung volcano adok; nisung aika jena ao

Goma, Monupii/May 23 (Agencies): Democratic Republic of Congo nung volcano adokba sülen nisung meyirijang aoka pei ki yutsür jena ao.

Anüng merem-merema kuma aser Mount Nyiragongo nungi ayong ama molushi tatsük jazüka aluba mapangnüburtemi taoba mapang ama lendong ajurutsü tsübua liasü.

Goma yimti nungbo nübur ajunga anizüker ao, kong nisung million ana shi alir.

Ajisüaka yimti nung mokongshi aser yangji alirtem tang kidangi meyipa shilangba mapang lir.

Goma nungi kilometer 10 shi pilar aliba volcano ya 2002 küm adoka nisung 250 aser nisung 120,000 shi talidak ki

mali akum.

Tang tesüsa pokteta adokba mapang nisung asü-amaba osang mali aser ki kwi raksar memetet.

Communications Minister Patrick Muyay-i Deobarnep tweet ka nung, molushi jazüka aluba ajema akumer aser tensa asadanga mapang lir, ta ashi.

Molushi tuluba ka yimti leni masü arem leni yimzüka ao, ta DR Congo yimtiba, Kinshasa nungi osangbener kati ashi.

Molushi ya international airport atongtsü anasa anen aser ki kar rongdoka leper ka ajang, ta ashir.

Ketdangsürtemi osang tejanga magütsü, ta nüburtemi ola adoker aser social media nunga osang balala prokshir.

Iba volcano adok tenzük

ghonda ishika lir sorkari osang kecha mesangdong tsüngta nüburtem aben süoshi bener Goma yimti nungi jena oa liasü.

Nisung aika anasa aliba Rwandan arrtsüleni ao aser aika yimti tezülen tenem bushia ao.

Alima nung Mount Nyiragongo ya active volcano tali adokba ka ta züngshir, saka senotsü ochishia mamshiba mechi World Bank ajanga teyari agütsüba anemba sülen Goma Volcano Observatory-i iba volcano inyaksangshi junga merepranger, ta ashir.

Iba tenem nungi 1977 küm volcano adokba mapang nisung 600 dak tema süa liasü, saka iba sülen lendong atalokaka asü-amaba aser ki-o-jen raksaba tajemba liasü.

Nepal parliament loksatsüba atema opposition-i ken o benoktsü

Kathmandu, Monupii/May 23 (Agencies): Nepal tir-i ita pongu tsüngda Honibarnü House of Representatives tanabenbuba loksatsüogo aser November ita election agitsü sangdongogo. Tir-i, Ato Kilonser K P Sharma Oli aser Opposition alliance-i sorkar kümtetsü atema benokba magizük aser parliament loksatsü, koba okadak tanaben benoktsü lir.

Tir Bidya Devi Bhandari-i, House of Representatives ya Constitution Article 76(7) dak ajemdaker loksatsüogo, ta sangdonga liasü.

Article nung, ita trok tsüngda election tanga ka agishitsü shia lir. Iba dak ajemdaker tir-i election ya November 12 aser 19 nü agitsü latetsüogo.

Ato Kilonser Oli-i, Hokolbarnü tir office dang züngsem 275 agi kümtetba House ya loksatsütsü aser

election ka takaratiba nung agitsü atema sangdongtsü atema benokba sülen iba osang sangdonga liasü.

Taoba mapang Oli aser Opposition lenir Sher Bahadur Deuba na Ato kilonser menden raktepa liasü, ajisüaka tir-i tenaprongla magizük aser ashiba agi, tenapronglai vote of confidence mekoktetsü.

"PM Oli-i Opposition alliance pusemertema pa pusemer ama züngoksem aser kasa mapang nung UML aser JSP-N nati party anema nokdaker nem tapet temerenshi agütsütsü ta shia shiti lemshia liasü," ta Bhandari-i Hokolbar aonung ashi.

Tir Office sangdong ajanga ashiba agi, CPN-UML MP 26 aser Janata Samajbadi Party MP 12-i Oli aser Deuba naprongla pusemer.

Tir-i iba osang sangdongba sülen Nepal nung yimden yimsüsüba tsütsü ano

mepetmesü tuluba adokogo. Lai taoba küm December ita Oli tetuyuba nung House loksatsü aser iba ajanga mepetmesü tulu adok. Ajisüaka Supreme court-i February ita tena longjemer iba jenjang agiba ya magi kümdaktsü

Tena longjemer kasa jenjang agiba ngua Nepal Opposition alliance lenirtem Honibarnü senden ka amen, aser PM Oli o Tir Bhandari nati temzüng ozüng aser democracy inyakyim anema jenjang agiba atema temzüng ozüng aser yimden yimsüsüba inyakyim dak ajemdaker jenjang tapet agitsü asoshi telemtetba agi.

Senden tembangba sülen lenirtemi külem sangdong ka ajang, Tir-i iba jenjang agiba ya temzüng ozüng aser democracy inyakyim anema aser tashiyim amshiba maparen ka lir ta ashi.

Linük temzüng ozüng kübok Article 76 (5) nung Ato Kilonser tasen ka shimtsü atema MP timba kati mulunga agizüktsüla ta shia lir, ajisüaka tir-i iba temzüng ozüng sülen manidaki aibelenogo, ta külem sangdong ajangasa metetdaksü.

"Iba melena lai Ato Kilonser Oli pusema tebilemba tamajung nung Parliament loksatsü, koba temzüng ozüng aser democracy anema lir. Iba jenjang agiba ajang linük yimden yimsüsüba mepetmesü tulu nung lir," ta lenirtemi ashi.

Iba sangdong nung ya Nepali Congress tir Sher Bahadur Deuba, CPN-Maoist Centre Chair Pushpa Kamal Dahal 'Prachanda', CPN-UML lenir Madhav Kumar Nepal, Janata Samajbadi Party-Nepal mendenbuba Upendra Yadav aser Rastriya Janamorcha Vice-Chair Durga Paudel nungeri sign sür

liasü.

Opposition alliance-i, Deobarnü MP ajak longjemer Supreme Court nung ken o benoktsü atema asatopogo aser tir-i telemtetba agiba ya tangsa tang agintsü khangogo.

Tir-i Ato Kilonser den longjemer temzüng ozüng aser democracy anema inyakba atema party lenirtemi aitsüogo.

Opposition alliance-i ashiba agi, linük nung COVID-19 wara pokteter kanga timtem nung aliba mapang ka nung sorkari tashiyim amshia yimsü asüba atsülangner.

Nepali Congress-ia, tir Bhandari aser PM Oli nati tena ajangzüktsü atema temzüng ozüng amshiba asoshi aitsüogo.

Kasa mapang nung House of Representatives Speaker, Agni Prasad Sapkota-ia, tir Bhandari-i house loksatsütsü atema telemtetba agiba ya Nepal temzüng ozüng anema lir ta ashi.

Dibrugarh Police-i temesepba mozü shibelener ka apu

Monupii/May 23, 2021 (Agencies): Deobarnü (23.05.2021) Dibrugarh Police team kati Ananta Gogoi'er ki mita aoba mapang heroin gram 58 apu aser sen 93,000 ngutet.

Narcotic Drugs and Psychotropic Substances (NDPS) Act, 1985 kübok Police-i temesepba mozü shibelener Ananta Gogoi puogo.

"Osang tejangja ka angazükba sülen, onoki ki ka mita aotsü asoshi maparen tenzük aser Ananta Gogoi ket nungi heroin gram 58 den sen 93,000 ngutet," ta Dibrugarh police station indang officer-in-charge, Rajiv Saikia-i ashi.

"Onoki iba nisung puogo aser iba dak sendakba ken o okadak benokogo," ta police ketdangsur Saikia-i ashi.

Temesepba mozü shibelener maparen nokdangtsü asoshi Dibrugarh

Police-i maneni meranga inyakdaki aser parnoki nendaka inyakba shi parnoki temesepba mozü den iba maparen nung shibelener tem jenti puogo.

"Ananta Saikia-i temesepba mozü ayoktsü atema bener aru. Lanur aika temesepba mozü alitsü asoshi pa dangisa arur ta Nirmali Gaon nung alir aikati ashishiba onoki osang angazük," ta police sangdong ajanga metetdaksü.

Tawa, Dibrugarh Police-isa tesem ana mita ao, kong Dibrugarh kübok Panchali tesem nungi ganja seret 27 aser Lahowal nungi heroin gram 6.30 aser brown sugar gram 21.52 shi ngutet.

"Lanur aikati temesepba mozü achir aser anibelem magii ayong ayonga sen aatsü mechi temesepba mozü shibelener maparen nung parnok inyaker.

Tawa tanü lanurtem tsüingda temesepba mozü achiba aser shibelener maparen tali bulua akümba ya lokti atema tebilemtsü tuluka lir," ta kasa sangdong nung shia lir.

Dibrugarh superintendent of police Shwetank Mishra-i ashiba agi, "Temesepba mozü anema raratsü asoshi Assam Police-i mapatong ka tenzükogo aser iba mapatong dak sendakba nung Dibrugarh kübok temesepba mozü shishilembaba nokdangtsü/samatsütsü asoshi mera tapet agia maparen inyakdaki."

"Iba mapatong maneni tejakleni bener aoba shilem ama, Deobarnü onoki temesepba mozü shibelener ka puogo. Tawa, temesepba mozü shibelener maparen nung dena alir nisung ana tashi onoki pua lir," ta Dibrugarh Police tekolakbai ashi.

Maneskin-i 'Eurovision Song Contest' kokogo



Rotterdam, Monupii/May 23, 2021 (Agencies): Italy nunger rock band - Maneskin-i Rotterdam nung ayongba Eurovision Song Contest takok nguogo.

Iba kentener telok, shirnok taküm indang 'pre-show favourite' rongnung dena liasü, Honibar (22.05.2021) aonung Rotterdam Ahoy arena kübok terepranger ishika matsündang ayongba sentong nung parnoki takok angu aser iba sentong takok anguba osang sangoktsüba sülen, parnoki "rock and roll never dies" olen agi kuli süa iba takok pelashishia agizük.

"Europe aser alima ajunga nung alirtem dang 'rock and roll' ya kodanga mesamatsü!

ta onoki shiner," ta Maneskin-i ashi.

Maneskin pur ken 'Zitti e buoni' ajanga Europe linük balala nung fans tem atsüa arur sülen, vote ajanga parnoki taküm indang Eurovision Song Contest takok jenjang ajangzüktem.

Atangji nungbo, jury vote sülen, Italy nunger Rock band yagi point 208 dang ngua tasembuba jenjang ang tongtet. Iba mapang, Maneskin pur ya kasa tetoktepba nung point timtiba ngur alir telok (France aser Switzerland) ana tesülen liasü.

Ajisüaka, public vote ajanga par teloki talila point 318 aazük aser ibaji ajanga parnoki telok anaprongla

ajangteta temaba jenjang tongtet.

Taküm sentong nung UK nunger James Newman-i point ka danga menguteti table punglanglen tashi luadok.

Iba aonung, tetoktepba sentong nung arishi küm 35 tain musician James-i atenba 'Embers' yagi tereprangertem atsüa maru aser ibajagi pai point ka danga aazüktsü maongka mangu.

Iba sentong ayongzüktsü asoshi ita ishika osang tejangja ka magiteti arur sülen, Rotterdam Ahoy arena nung terepranger 3,500 (arena nung shilem 100 nungi shilem 20) aruagi denogo aser TV viewer million aikati Maneskin puri Eurovision akokba nguogo.

Pelaba Lemsateper



ASO
15:10:1926

ASÜ
17:05:2021

Lt. Mrs. Senkalemla Imchen

Tesüngjem tetsü, arishir Wt. Senkalemla Imchen (Mangmetong), la iba lima nungi pilar, onok mangyim jashi mapang nung kinunger, medemer, kidang-kiyonger, yimtsür-yimertem aser temeimertem ana aser talang nungi shirnokisa aria bilem mulungsentsü agi nübo, rongsen aser sarasadem ajanga ozü asüku nung yaritepogo, nenok ajak den onoki kanga pelaba lemsateper. Nenok temeim mapa tajungtem ozü mulungjang nung teti alitsü.

Tsüngrem Tulusangi nenok tali dang moajangma.

- Temeim kinungertem.

Mulungnen O



ASO:
27-02-1926

ASÜ:
18-05-2021

Onoki teti meima aliba tsürabur asür R. IMNAJUNGBA JAMIR (Asangma) Tsüngremi agütsüba arishi anogo tonger akümüli tembangba anogo nung onok mangyim tia nung alidang shirnokisa nübo, sarasadem, rongsen agi yaritepogo nenok ajak dang kanga pelaba lemsateper. Tajung Tsüngremi talubo temoatsü agi nenok ajak meyipa moajang ta sarasademtsür.

Temeim chirnurtem aser semchirtem.

Mulungnen O



Onoki teti meima aliba kinungbo aser obala asür I. IMLIMEREN LEMTUR (Molungkimong) temang manemi aliba mapang nungi akümüli tembangba anogo aser lepkhumong anogotem ajak nung ozü mangyim tia nung alidang shirnokisa nübo, rongsen aser sarasadem agi yaritepogo, nenok ajak dang kangasa pelaba lemsateper.

Talisa onoki item dang kanga kanga pelaba shisemer.

1. Mr & Mrs Temjenwati (Kohima)
2. Purtooshi Zünger Asangma
3. Dimapur Ao Baptist Arogo (DABA)
4. Mr Supongmeren Lemtur, Dimapur
5. Mr & Mrs Imna Aier, Dimapur
6. Mrs & Mrs. Toshiyanger, Dimapur

Nenok temeim mapa tajung onoki kodanga mamatsü aser ozü meyipa agütsütsü kecha mali saka Tulusang Tsüngremi nenok taküm talubosa moajangma ta aji ozü tamang sarasadem.

-Temeim kinungtsü, jabaso aser kinungertem.

BTS-i 'Mega Online Concert' ayongzüktsü



Seoul, Monupii/May 23, 2021 (Agencies): Alima ajungai sapuba K-pop telok - BTS pur tenteter küm 8 ajungba nungtem nung online concert sentong ka ayongzüktsü

terenemba lir. "BTS 2021 M U S T E R S o w o o z o o" ta nungja agütsür kentener telok yagi iba online c o n c e r t ayongzüktsü.

Anogo ana t a s h i ayongzüktsü aliba mega online sentong ya June 13 aser 14, 2021 aonung 6:30 ako meta (KST) agitsü. Taküm küm tetenzüklen BTS teloki ayonga agiba online concert ama iba concert

ketdangtsüa agitsü. Alima tesem balala nung ARMY züngsemtemi online sabang ajanga iba concert reprangtetsü.

BTS telok tenteter külen nungi küm shia June 13, 2021 anogo parnoki 'Muster' sentong agia arudar. Ajisüaka, coronavirus wara süshia maoba ajanga taoba küm iba sentong thitemja liasü.

Iba sentong (Muster) melena, BTS-i 'Bang Bang Con' ta nungja agütsür streaming sentong ka ayongzük, kong telok indang taoba concert aser fans den ajurutepa video tem

sayua liasü.

BTS teloki "BTS 2021 MUSTER Sowoozoo" atema registration dak sendakba nung osang tejangja magütsü.

Iba online concert atema BTS-i osang sangoktsüba sülen, BTS ARMY züngsemtemi Twitter sabang ajanga iba sentong asoshi yongya ataba lemsatepogo.

Tesüiba anogo ana tejakdang, May 21, 2021 nü BTS puri taküm indang kanga dang yongya ataba ken - 'Butter' sayaogo. Iba ken takok ngua sayaba den, 'Butter' yagi telok indang taoba record ajatetogo

aser iba den atongsema YouTube music video Premiere nunga jenjang tasen ka tongtet.

Maneni, 'Mega Online Concert' dak alaka, K-pop tebur telok yagi Billboard Music Awards nung parnok indang ken tasen - Butter atentsü renema lir. Iba sentong ya May 24, 2021 anepdang 5:30 ako nungi tenzüktsü. Iba sentong nung shilem agiba dak alia BTS puri Top Social Artist category nung nomination ngua lir. Iba category nung par teloki pungobenbuba nomination angur alitsü aser BTS-i küm pezü tashi atonga iba award ngua lir.

Delhi Police Special Cell-i Sushil Kumar puogo



Monupii/May 23, 2021

(Agencies): Olympic nung medal ana tashi ngur aliba India nung wrestler Sushil Kumar, Delhi Police Special Cell-i puogo. Chhatrasal Stadium nung mangatetep adokba sülen international wrestler, Sagar Rana asüba ken o nung aija pa Deobar anepdang Delhi nung apu. Police-isa, Sushil Kumar nem teyari agütsür ka puogo, shibai Sagar Rana tepsetba mapang nungi Kumar meiner senzüdar.

ACP Attar Singh-i achaaaynga, Inspector Shivkumar aser Inspector Karambir nati anir Special Cell SR team kati Sushil aser Ajay Kumar na puogo.

Tanep ANI sangdong ka ajanga Delhi Police ketdangsür

kati Sushil Kumar apuba osang ya tai ta ashiba metetdaksüogo. Taoba international wrestler Sagar Dhankar tepsetba ken o nung Delhi Police-i Jalandhar anasa Kumar puogo ta Honibarnü osang balala prokshiba sülen iba osang sangdonga liasü. "Wrestler Sushil Kumar ano mapu lir. Delhi Police team ka Punjab nung oa lir," ta Delhi Police ketdangsür tejen kati ANI dang ashi.

IANS-isa, ken o nung aija aliba pa medemer Ajay Kumar dena puogo, ta metetdaksü.

Delhi Police-i, Sushil Kumar indang osang agüja pa apuba nung teyari agütsürtem nem senpet sen lakh ka agütsütsü nangzük. Police-isa Ajay Kumar apuba nung teyari agütsür nem

senpet sen 50,000 agütsütsü nangzük. Tenaprongla ya jenshia senzüa liasü.

Delhi nung okadak akati Sushil Kumar aser tangar trok nem non-bailable warrants agütsüogo. Iba ken o dak sendakba nung wrestler anema lookout notice ka agütsüba sülen anogo ishika lir non-bailable warrant ya agütsü.

Parnoki, sections 302 (murder), 308 (culpable homicide), 365 (kidnapping), 325 (causing greivous hurt), 323 (voluntarily causing hurt), 341 (wrongful restraint) aser 506 (criminal intimidation) dak ajemdaker ken o ka benok. Maneni iba ken o ya Indian Penal Code kübok section 188 (Disobedience to order by public servant), 269 (negligent act likely to spread infection of disease), 120-B (criminal conspiracy) aser 34 (common intention) aser Arms Act kübok section tapet dak ajemdaker benoka lir.

May 4 nü Chhatrasal Stadium nung wrestler telok ana mangatetep adok aser iba sülen yiruba ajanga arishi küm 23 tain Dhankar asü.

Delhi court-isa Kumar anema non-bailable warrant (NBW) ka agütsüogo.

China nung Ultramarathon asemer 21 asü

Monupii/May 23, 2021

(Agencies): China nung 100-kilometre cross-country mountain race ka ayongzuka asemtepa mapang rür, tzünglu temekong aser mopung tesashi aonba sülen nisung 21 süogo, ta state media-i Deobarnü metetdaksü.

Northwestern Gansu province kübok Baiyin yimti anasa Yellow River Stone Forest nung Honibarnü asemtepa mapang tsüngsang mopung tamajung agi asemtepertem dak kongshi.

Asürtem rongnung China nung nungtu long-distance runners tema densema lir, ta local media sangdong ajanga metetdaksü.

State broadcaster CCTV-i Deobarnü sangdong ka ajanga asemteper rongnung ka mongui aliba ngutetogo, saka süadoker liasü, ta metetdaksü.

"Iba lendong nung ajak senteper nisung 21 süogo," ta CCTV-i ashi. Yimti nung ketdangsürtemi Deobarnü osang agütsüba mapang, nisung 20 süogo aser nisung ka samara bushidar, ta metetdaksür liasü.

Baiyin yimti mayor Zhang Xuchen-i, anogo tom ka nung ashiba agi, ultramarathon lenmang nung kilometer 20 aser 31 tsüngda ajungbena

tsüngsang mopung tesashi agi kongshia liasü.

"Mapang tatsüka tsüngda rürlong, tzünglu temekong aser mopung tesashi agi iba tesem kongshi. Iba sülen temperature kanga ajema aküm," ta Zhand-i ashi.

Asemtepa nung shilem agir kari teyari meshiba sülen mapang tatsüka dang lir marathon ayongzükertemi rescue team ka yok aser asemtepa nung shilem agir 172 nungi 18 kümzük.

Nikongtsütsü 2 ako shi nung tsüngsang tamajungba akümba ajanga asaya thitsü aser local ketdangsürtemi teyariri talila yok, ta Zhng-i ashiba den iba ken o maneni bushitsüngdangtsü ta ashi.

Asürtem rongnung temaba jenjang nung aliba domestic marathon runners Liang Jing aser Huang Guanjun na densema lir, ta local media sangdong ajanga metetdaksü. Liang-i kümtem tsüngda Chinese ultramarathon aika kokogo.

Huang shiba tenarong tajak aser temeli tatsük lir, pai 2019 küm Tianjin nung National Paralympic Games tebur hearing-impaired marathon koka liasü. Marathon ayongzükertemi pa asüba osang medemer ka nem metetdaksü.

State news agency Xinhua

sangdong ka ajanga ashiba agi, asemtepertem kar hypothermia agi kangshia liasü aser Zhang-ia, nisung ti yirur mozükidang temang anepaluba indang metetdaksü.

State media nung sayuba video tem nung tekümzükertem aonung flashlights bener tenem soa atuba sayuogo. Marathon asemer kar sü nung aleper tekümzükertemi stretcher nung mejangdaksüba video dena sayaogo.

"Kü tsüngsem aser moja densema temang ajunga metener liasü. Mopung tesashi aonba agi ni indang indanga menokdaktet aser oner aotsü ta shisabulua bilem. Temekok ya lila lia mekoktetsüsa aküm," ta asemteper kati ashiba local media sangdong ka ajanga lemsatep.

Iba tesem nung aonung temperature kanga mokonga akümba ajanga tekümzükba maparen inyaksü kanga saka aküm, ta Xinhua-i ashi.

Gansu ya China nung sensaktiba tesem ka lir, kong mapang shia anentsüh, tzümetsüng tesashi agi kongshi. 2010 küma iba tesem nung anentsüh aluba lendong nung nisung 1000 dak tema süogo. Iba tesem nung menoknoka mapang shia anoker.

IPL tanabuba shilem UAE nung asayatsü

Mumbai, Monupii/May 23

(Agencies): Indian Premier League tanabuba shilem United Arab Emirates nung September aser October ita nung asayatsü renema lir. IPL nung ano knockout asaya pezü densema asaya 31 anunga lir. May 29 nü BCCI züngsemtem senden ka amenba mapang iba osang ya sangdongtsü imlar.

Kasa mapang nung India team England den August 4 nü nungi tenzuka Test pezü asayatsü renema lir. Sources ajanga ashiba agi, tanabuba aser tasembuba test na tsüngda anogo teku tetsüngda ita lir. "Iba tetsüngda ya anogo pezü kümdaktsütetra BCCI nem anogo pongu talila agütsütsü," ta source-i ashi.

BCCI-i, Test pongu asayatsü atema anogo 41 mekazuka yua aliba ya melenshitsu atema tang tashi ECB den officially sensaksema mali. SGM nung iba ken o benoka sensaksemer telemtepa ka agitsü.

BCCI-i, ECB nem temepeshiba kecha magütsü renemer aliba ama India-England asayamung tembangba sülen IPL tanabuba shilem ayongzuka asayatsü atema sentong yanglura, iba asayamung asayatsü atema September 15 nungi October 15 tashi mapang adoktsü.

"India-England na asayamung nungi anogo talila kar agizüktetra anogo talila bendenloktsü. Aji ta mesüra anogo 30 nung ya anogo kabo India team aser England nung asayartem UK nungi UAE arutsü atema mekazuka

toktsütsüla aser knockout asayatem atema anogo pongubo agizuka ayutsüla. Anungji asaya 27 asayatsü atema BCCI ket nung anogo 24 lir. Iba mapang tsüngda weekends pezü ajurutsü, iba tetezü Honibar ti aser Deobar ti, kong asaya anana (ajak senteper 16) asayatetsü. Hopta tatem i asaya anana asayatetra anogo 19 nung asaya 11 asayatsü asoshi BCCI nem maongka agütsütsü," ta source-i ashi.

Hopta talila ka ya tetenzüklen mesera tatemlen amshitsu akok. Maneni BCCI-i ECB dang mepeshia hai haora katepra, October 18 shi nungi T20 World Cup tenzükba mapang matong tsüngda mapang tatsükabo tetsüngda adoktsü.

IPL nung shilem agiba team ajakbo knockout tonga masayatsü, anungji asayar shirnok tsükadokdir, parnokbo World Cup atema pei team nung oa dentettsü, ta BCCI-i bilemer. "IPL ya WC atema warm up agitsü kanga tetemsü asütsü," ta source-isa ashi.

"International Cricket Council (ICC)-i iba mapang tatsüka adokba ya kanga süoki ia asadangdar aser World Cup asayatsü aliba nung tetsükdaktsü kecha madokra parnokki mejushitsu," ta source-i ashi.

BCCI-i, T20 World Cup ya lateter aliba ama India nung asayatsü ta sangdongba dak alaka tanga osang kecha agütsütsü imlaa matar. Indian sub-continent nung wara koma azüokteter iba dak ajak keta lir.

MDCA-i asükhu lemsatep



Dimapur, Monupii/May 23

(TYO): Mokochung District Cricket Association-i sangdongka ajanga MDCA mezüngbuba tir B. B Gurung Delhi nung asüba osang angazuka mang ayimba lemsatepogo. B. B Gurung ya 1992 nungi 2000 tashi MDCA tir liasü.

Tanü onok nisung tajung ka asüba mang ayimer. Tulusang Tsüngremi par kinunger nem anisüngzük agüjang aser asür tanüla tesunep nung anisüngzükdakjang ta sarasadentsür. Asür kibong den onoki asükhu lemsateper, ta MDCA tir Imlikumzuk-i sangdong ka ajanga lemsatep.

BILEMDANGANG

"Akoktsü bilema noktak dang taochi sayutsü amadoker."